

精校本
斷句

傷寒大白

王大錯署簽

傷寒大白卷三

雲間秦之楨皇士纂著

孟河費慎甫校訂

無汗

傷寒論無汗者九。不得汗者四。不汗出者一。明理論陶氏書。惟寒邪一條失之。太簡。以無汗為表症居多。則可以無汗為止。是寒邪。則不可。傷寒論太陽症無汗。發熱身痛。手足冷。脈浮緊。冬用麻黃湯。太陽中風。脈浮緊無汗而煩躁。乃營衛兩傷。冬用大青龍湯。陽明症頭痛鼻乾。脈浮無汗而喘。冬用乾葛湯。此皆是寒邪在表而無汗。用發表者。若陽明症無汗。身必發黃。茵陳梔子豆豉湯。陽明無汗。渴欲飲水。無表症者。白虎湯。此皆熱邪在裏而無汗。用清裏者。又云結胸症。但頭汗。用大陷胸湯。但頭汗。身發黃。用茵陳湯。心中懊憹。但頭汗。梔子豆豉湯。此水飲內結而無汗也。又云脈浮而遲。遲為無陽。不能作汗。身必癢。此陽虛人外冒表邪。不能作汗外解。用扶元發汗者。以上皆傷寒門無汗之症也。今有嘔吐惡心。胸膈滿悶。無汗喘急。脈滑不數。此痰結無汗。用二陳湯。導痰湯。有飽

悶。暖氣發熱無汗。右關滑大。此食滯中焦。胃陽不得敷布而無汗。用平胃保和散等。又有發熱惡寒。無汗脈不出。此表邪內伏。用升陽散火湯。又有發熱無汗。寒涼抑遏。而用溫中升散者。凡此皆不得已而推廣治法也。然無汗之症。到底用發散者多。例如脈伏無汗。用升發正也。脈大無汗。而用升發。無得也。即脈細用升發。寒涼抑遏。用升發。痰凝食滯。用升發。皆無礙也。至如雙解散。小柴胡湯。梔子豆豉湯。治表有邪裏有熱之無汗者。若治脈伏無汗。則內有一半寒藥。而礙表邪。若治胸滿痰結。寒凝食滯。則內有一半寒藥。而犯凝滯。又如白虎湯。陽明和解發汗者也。而條下註明。表汗未出。表症尚在者。未可服。唇口乾渴。不能消水。脈不數大。亦未可服。夫石膏湯尚如此。則黃連大黃。更不宜矣。惟熱鬱火閉之無汗。不忌寒涼耳。然無汗症。第一在脈上消息。經云熱病脈躁盛。不得汗。陽脈之極也。死。又云陽病而見陰脈者。死。今細詳陽脈躁盛無汗一條。後來不論生死。原能作汗外出。若戰慄而出汗。後氣和者生。若不戰慄。洋洋汗出。氣粗口張。隨汗而死。若陽症脈陰無汗一條。則胃陽不足。津液內涸。到底無汗而死。

者多。大凡發熱無汗之症。必得汗多。則身熱方解。以其熱在皮膚。無汗。則熱邪何處發泄。故治無汗發熱。不論日數。須善為發汗。要知麻黃桂枝。但發冬月未鬱熱之寒邪無汗。不可用於三時熱令。羌活湯。乾葛柴胡湯。能發在表無汗。不能發在裏火閉無汗。滑石石膏。能發在裏火閉無汗。不能發在表無汗。淡豆豉。白豆蔻。能辛散中焦。抑遏無汗。不能發皮毛閉鬱無汗。枳殼木通。能發大小便下竅不通無汗。不能發在外表邪無汗。桑白皮地骨皮桔梗。能發肺氣壅遏皮毛無汗。不能發他經閉鬱無汗。仲景發表加杏仁。妙以開潤肺之皮毛。亦發汗良法。是以發汗。亦有理肺氣而出者。然治無汗。必要互看頭汗條者。桂枝湯本為解肌。若其人脈浮緊發熱。汗不出者。不可與也。當須識此。勿令誤也。

此以下五節。皆寒邪在表無汗。北方冬月。用麻黃以發汗。故曰。桂枝湯不可與也。

太陽病。頭痛發熱。身疼腰痛。骨節疼。惡風。無汗而喘者。麻黃湯主之。

此條承明上章發熱無汗之症不可與桂枝湯宜麻黃湯詳註惡寒頭痛。

太陽中風脈浮緊發熱惡寒身疼痛不汗出而煩躁者大青龍湯主之。

此條承明營衛兩傷不可與麻黃湯宜用大青龍湯詳註煩躁。

太陽病脈浮緊無汗發熱身疼痛八九日不解表症仍在此當發其汗服藥已微除其人發煩熱目瞑劇者必衄衄乃解所以然者陽氣重故也麻黃湯主之。此條詳註衄血麻黃湯主之一句在當發其汗下。

太陽病脈浮緊發熱身無汗自衄者愈。

太陽病脈浮緊發熱無汗當用麻黃湯因其人正氣旺未服麻黃湯而汗自出病愈此申明上章太陽無汗症若自衄乃解不必再用麻黃湯也。

傷寒脈浮發熱無汗其表不解不可與白虎湯若渴欲飲水無表症者白虎加人參湯。

上半節言無汗之症宜發汗戒用白虎下半節言渴欲飲水無表症者忌發汗宜用白虎。

陽明病。無汗。小便不利。心中懊懣者。身必發黃。

陽明病。無汗。小便又不利。則溫熱抑遏。不得發泄。故心中煩悶懊懣。濕熱久鬱。身必發黃。此條不立一方。而暗示陽明無汗。四條治法。無汗表熱。乾葛防風湯發表一法也。無汗小便不利。猪苓湯清利一法也。無汗心中懊懣。梔子豆豉湯治煩一法也。無汗身發黃。茵陳湯治黃一法也。

少陰病。但厥無汗。而強發之。必動其血。未知從何道出。或從口鼻。或從耳目出。名下厥上竭。為難治。

此條少陰傳經裏熱症。醫見其手足冷而無汗。絕似傷寒表邪未伸。誤用麻黃桂枝。辛溫強散其汗。則血得熱而妄行。或從口鼻耳目而出。

大青龍湯 見煩躁 乾葛湯 見似瘧。

茵陳梔子豆豉湯 三味

此陽明熱瘀在內。蒸發黃家。祕加乾葛防風。兼散表鬱。則全內外分消之治。

白虎湯 見潮熱 小青龍湯 見咳嗽

傷寒大白

卷三

無汗

三

補中益氣湯

人參 白朮 當歸 黃芪 陳皮 柴胡 升麻 甘草

表邪閉鬱而無汗。純用發表。中氣虛微。不能作汗。則用此方。家祕加荊芥防風。治勞力感冒。

二陳湯 導痰湯 二方見似瘧。平胃散 見譚語。

升陽散火湯

升麻 葛根 獨活 羌活 人參 柴胡 防風 甘草 白芍

表邪內伏。寒冷抑遏。發熱無汗。手足反冷。此邪熱不得發越。故用火鬱發之。消滯升陽湯

厚樸 半夏 枳殼 廣皮 升麻 葛根

陽明無汗。胸前飽悶。必是胃家有痰。飲食滯。故用半夏枳樸。以消胃滯。再加升葛。宣發表邪。

雙解散 見發狂

純是表邪無汗。則用發表。若表有邪裏有熱。則用此方雙解。

小柴胡湯 見惡寒頭痛

三陽表有邪裏有熱者。用前方雙解。少陽表有邪裏有熱。則用此方。

理肺發表湯 家秘治肺氣抑遏發熱無汗。

羌活 獨活 柴胡 乾葛 枳桔 桑皮

平胃發表湯 家秘治胃氣抑遏發熱無汗。

羌活 獨活 柴胡 乾葛 枳櫟 半夏

仲景首條立麻黃湯治無汗發熱氣逆喘滿用杏仁。默示肺主皮毛。肺氣壅遏則喘逆無汗。開發潤肺氣為發汗之真訣。又桂枝湯下云服藥後食稀粥以助藥力。此默示發熱有汗。必是胃無凝滯。故可食稀粥。以助藥力散邪。若發熱無汗。必是胃有凝結。不能作汗。故開發胃主肌肉。疎利胃陽為發汗真訣。又於頭汗條中申明但頭有汗。遍身無汗。皆係水飲淤熱凝結中焦。隔絕週身之道路。治宜宣發胃氣。疎通經絡。細玩麻桂宜北不宜南。故家秘化立敗毒散方法。加

枳桔桑皮名理肺發表湯治風寒壅肺發熱喘逆無汗之症此從麻黃杏仁方中化出治法又以敗毒散方加枳樸半夏蒼朮名平胃發表湯治痰涎食滯胸滿發熱頭痛身痛無汗之症此從太陽病有表症心下水飲用小青龍湯辛散水飲敷布胃中則內伏之水飲作汗而出外冒之表邪隨汗而解此一舉兩解化法用方之妙悟也

自汗

太陽症自汗出發熱不解惡風脈浮緩此風傷衛宜解肌仲景用桂枝湯家秘用羌活防風湯若太陽發熱自汗口渴小便不利此熱結膀胱仲景用五苓散家秘用羌活木通湯若太陽表邪已解自汗發熱口渴不惡寒此陽明裏熱自汗宜用涼膈散三黃石膏湯導赤各半湯若大便不通腹脹多汗脈沉而數此乃下症自汗也宜用三承氣湯仲景下法獨詳自汗條內者以下法最怕表症不散今自汗則表邪多解以上論冬令傷寒然亦可參治四時者外有汗自出身仍發熱之冬溫有自汗出發熱不惡寒而渴之溫病有發汗已身灼熱之風溫

有汗出身熱口燥渴之暑病有自汗出身灼熱煩悶口渴長幼相似之溫疫此皆四時有汗之寒熱病而非冬月傷寒自汗症也傷寒初起裏未鬱熱用辛溫散表若三時寒熱病裏先有熱後感風寒在表者用麻桂則礙裏熱故化立辛涼散表和解表裏兩法發散太陽羌獨敗毒散和解太陽羌活冲和湯發散陽明升麻乾葛湯和解陽明乾葛石膏湯發散少陽柴胡防風湯和解少陽小柴胡湯若表散裏熱仍照傷寒清裏之法太陽病欲解時從巳至未止

此言太陽時候也巳午主太陽故太陽病多發辰巳時太陽病欲解必過辰巳午時至未方解也

欲自解者必當先煩乃有汗而解何以知之脈浮故知汗出解也

此明太陽病欲解當必其脈浮先煩知其汗出而解

太陽病發熱汗出惡風脈浮者名為中風

此條言發熱汗出脈浮緩乃是風傷衛之中風症以無汗有汗分別中風傷寒

太陽中風。陽浮而陰弱。陽浮者。熱自發。陰弱者。汗自出。當發惡寒。漸漸惡風。翕翕發熱。鼻鳴乾嘔者。桂枝湯主之。

承明太陽中風。因衛之陽分有邪。故脈浮緩。營之陰分無邪。故不緊而弱。衛陽有邪。則發熱。營弱無邪。則不閉鬱。而汗自出。言翕翕發熱。形容表邪拘緊之象。鼻鳴喘逆。表邪氣粗也。乾嘔者。表邪嘔惡也。故用桂枝湯。急解風邪。太陽病。頭痛發熱。汗出惡風者。桂枝湯主之。

此申明頭痛發熱自汗之中風。宜桂枝湯者。

病人藏無他病。時發熱自汗出而不愈者。此為衛氣不和也。先其時發汗則愈。宜桂枝湯主之。

藏無他病。言無裏症。但時有發熱自汗表症。此衛氣有病。當未發作時。先服桂枝湯發汗。則愈。

病嘗自汗出者。此為營氣和。營氣和者。外不譫。以衛氣不共營氣和諧。故爾。以營行脈中。衛行脈外。復發其汗。營衛和。則愈。

此重明自汗出之病。營分本無病。因衛外之衛氣不諧。和於營氣。服桂枝湯以和諧營氣。則病愈。

發汗後。不可更行桂枝湯。汗出而喘。無大熱者。可與麻黃杏仁甘草石膏湯。主之。發汗後。飲水多者。必喘。以水灌之。亦喘。

大凡汗出而喘。似太陽中風桂枝湯症。深恐誤用桂枝。故曰若發汗後。不可更行桂枝。即自汗喘熱之表症。若身無大熱。但可用麻黃杏仁甘草石膏湯。蓋麻黃與石膏同用。化辛溫而為辛涼。麻黃同石膏。不惟散表。兼能清肺定喘。石膏得麻黃杏仁。不惟清肺。兼能散表。又云發汗後。飲水多。必水寒射肺而喘。若水灌之。則外閉毛竅。亦必喘。

下後不可更行桂枝湯。汗出而喘。無大熱者。可與麻黃杏仁甘草石膏湯。

前條發汗後。汗出而喘。無大熱。不可更用桂枝。此條下後汗出而喘。無大熱。亦不可更行桂枝。亦可與麻黃杏仁甘草石膏湯。兩條汗下不同。然汗出而喘。無大熱。則同。

傷寒發熱汗出不解。心下痞硬。嘔吐而下利者。大柴胡湯主之。

發熱汗出不解。心下痞硬。下利。此邪走腸胃。宜用下法。然發熱嘔吐。尚非承氣症。故用大柴胡湯。

陽明病。脈遲。出汗多。微惡寒者。表未解也。可發汗。宜桂枝湯。

此申明陽明病。亦有自汗。發熱惡風寒。中風者。但以脈遲不浮緩。別陽明也。陽明病。脈浮無汗而喘者。發汗則愈。宜麻黃湯。

此申明陽明病。亦有無汗。寒傷營症。但脈不緊。別陽明也。非教人必服麻桂。當比例用方可也。

問曰。陽明病外症云何。答云。身熱自汗出。不惡寒反惡熱也。

此申明陽明病裏熱外症形象。身熱自汗出。不惡寒反惡熱者。

陽明病。脈遲。雖汗出不惡寒者。其身必重。短氣腹滿而喘。有潮熱者。此外欲解。可攻裏也。手足濇然而汗。此大便已鞭也。大承氣湯。若腹大滿不通者。可與小承氣湯。微和胃氣。勿令大泄。

此申明上章。自汗出不惡寒反惡熱脈象症形。分詳裏症之大下未可下。微和胃氣之次第輕重。

陽明病汗出多而渴者。不可與猪苓湯。以汗多胃中燥。猪苓湯復利其小便故也。

此言汗多而渴。宜生津退熱。不可用猪苓湯。

病人煩熱。汗出則解。又如瘧狀。日晡所發熱者。屬陽明也。脈實者。宜下之。脈浮虛者。宜發汗。下之。與大承氣湯。發汗宜桂枝湯。

此一日一發似瘧之症。言病人煩熱汗出而解。至明日日晡。又見先寒後熱。此陽明經似瘧。脈實多汗。便結腹脹。宜承氣湯下之。如尚有頭痛惡寒發熱表症。而見浮緩虛脈。尚宜桂枝湯汗之。

傷寒發熱無汗。嘔而不能食。而反汗出濇然者。是轉屬陽明也。傷寒轉繫陽明者。其人濇濇微汗出也。

發熱無汗。太陽症。今有汗出而至濇然者。轉屬陽明矣。故轉屬陽明。必濇濇。

常有微汗出而不乾。然雖屬陽明。未見熱結在裏。故不用下法。

太陽病三日發汗不解。蒸蒸發熱者。屬胃也。調胃承氣湯主之。

汗出熱不解。蒸蒸常有汗者。屬胃家裏熱。故與調胃承氣湯。上條但澼澼微汗不乾。此條蒸蒸時汗外達。邪已入裏。故立調胃承氣湯。以示微下之意。

陽明病。其人多汗。汗以液外出。胃中燥。大便必硬。硬則譫語。小承氣湯主之。若一服譫語止。更莫復服。

較上章多譫語。大便硬二症。故用小承氣湯。但清胃熱。譫語一止。莫再服。不服。恐熱氣不清。多服。恐無燥糞。

汗出譫語者。以有燥糞在胃中。此為風也。須下之。過經乃可下。若下之太早。語言必亂。以表虛裏實故也。下之則愈。宜大承氣湯。

上章多汗亡津。腸中乾結。內熱譫語。未必燥屎。故用小承氣湯。此章汗出譫語。且有燥屎在腸胃之中。乃是陽明風熱消津結硬。蒸其胃汁。外騰陰血。陽津有立盡之勢。則須下之。以表虛無邪。裏實有熱。下之則愈。宜大承氣湯。然

立大下之法。又恐後人下早。故先戒曰。過經表散。乃可下之。若下之太早。則表邪內攻。語言必亂而死矣。前四句。立大下法門。中三句。闢防下早變症。末三句。繳前應下方法。失下。恐津液立盡。早下。恐變症不測。仲景豈以未過經而下早。變出內亂神明危惡之症。反輕言下之則愈。復立大承氣大下危法於後。

陽明病發熱汗多者。急下之。宜大承氣湯。

言陽明病。則無太陽少陽表症。言汗多。則陽明表邪盡解。仍發熱。乃是裏熱。蒸汗盡出。故用急下。前條言瀉瀉蒸蒸汗出。初入陽明裏症。用調胃承氣清胃熱。中條言汗多。津液竭。大便硬。可用小承氣微下。後條言譫語。有燥屎。當用大承氣大下。此條總結上文。發熱汗多。表解譫語。大便硬。有燥屎。已過經下症。當用急下大下之法。

太陽病。項背強几几。反汗出惡風者。桂枝葛根湯。

太陽病。項背強几几。無汗惡寒。當用麻黃湯。太陽病。項背強几几。反汗出惡

風當用桂枝湯。今用桂枝葛根湯。必汗出惡風。又兼見陽明症。

三陽合病。脈浮大上關。上但欲眠睡。目合則汗。

三陽合病。脈浮大。表脈也。上關。少陽也。肝胆主目。合目則汗。盜汗也。雖不立方。然宜用小柴胡症。

三陽合病。腹滿身重。難以轉側。口不仁而面垢。譫語遺尿。發汗則譫語。下之則額生汗。手足逆冷。若自汗出者。白虎湯主之。

前條三陽合病。發明脈浮大上關。上目合則汗。以示少陽和解主治。此條三陽合病。發明腹滿身重。口不仁。面垢。譫語。遺尿之裏症。以示陽明清裏主治。非表症。故發汗則譫語。非下症。故下之則額生汗。因手足冷。復戒之曰。自汗出者。可用白虎湯。

桂枝湯 見惡寒

羌活防風湯 見項強

涼膈散 見發狂

三黃石膏湯

黃連 黃芩 黃柏 石膏